

Jahresbericht 2021 Aktive

Et voilà: Üse Jahresbricht,

Dismou einisch in Form vomene Gedicht.

Gstartet heimer das Johr nid wie süsch gmüetlech im Warme,

sondern dusse mit Chappe, Händsche und Meetli ade Arme.

Bi Wind, Räge und chaute Temperature go jogge,

das isch nume öppis für die Hertgsottne.

Ou der Paul darf ab und zue im Training nid fähle,

Mit ihm müesse mir üs dür 16 Pöschte quäle.

Am Barre hange und vo Matte zu Matte schwinge,

Bi Ninja Warrior würde mirs auso ono wit bringe.

Es chunnt scho mou vor, dass nachem Training es Outo abligt,

De isch zum Glück d Stadtmusik Biel nid wit.

Steuverträtend fürs Trainingsweekend hei mir es Velotüürli gmacht.

Uf Sutz gradlet und zrügg fürne Spiliobe und es gmeinsams Znacht.

Bi schönschtem Wätter heimer im Summer der Räbewäg bestritte,

dank em einte oder angere Gläsli Wii het niemer glitte.

Zrügg simer mitem Schiff übere Bielersee,

Dr Abschluss macht e Pizza vom Peti, was wott me meh?!

Nach de Herbstferie isches ändlech wieder so wit

Für üses Soiréenummero «let me entertain you » simer fit

Mit Hund, Bademantu und Flip Flops uf der Bühni heimer üse Spass
Und ufem Hoverboard gäbe mer bsungrigs Gas.

Wiehnachte gfiiret heimer de bi Glüehwii und Pommes Frites,
aui zäme ungerem Stärnehimmu, so isches der Hit.

Jetzt gits vo üsere Site nume no öppis z säge,
Merci a üsi Aktive für das Johr, uf dass z 2022 genauso wird fäge.

Öii Leiterinne, Tanja und Ramona